

浙江文叢

桑調元集

〔第四冊〕

浙江出版聯合集團
浙江古籍出版社

浙江文叢

桑調元集

〔第四冊〕

〔清〕桑調元著 林旭文點校

浙江出版聯合集團
浙江古籍出版社

衡山集卷五

詩五 古今體詩一百一十首

九江

連夕奔騰下水艘，琵琶亭上闢高窻。翠飛廬嶽盤千髻，湍激潯陽播九瀦。關塞雁鴻投遠浦，漁舟燈火散空江。故人舊愛風騷客，定擘銀箋倒玉缸。

庾樓

在府治中。

有客秋乘興，憑凌上庾樓。盃中孤月墮，窻外九江流。塵壁題餽管，寒空攬兕裘。欣逢賢地主，欲作判年留。

奉和董定岩榕相度濂溪書院韻二首

杖入雲岩裏，蓮華照眼明。圓峰當戶合，活水繞田清。卓午光風轉，深秋翠草生。陽坡新

面勢，千杵動雷鳴。

卜築濂溪復舊模，亭臺高下占名區。書堂雲氣晴飛棟，講席風聲早濫竽。定岩留予爲山長。繁露玉杯傳世學，餘山銀榜續印須。餘山先生齋名須友，今將構祠堂于此。清懸太極岩頭月，照向廬陰掃綠蕪。

陪定岩濂溪書院視工四首

出郭已清曠，兩湖明鏡澄。浦舟浮葉葉，岡竹插層層。草徑修蛇蜿，筴輿脫兔騰。書堂新卜築，陪歷記吾曾。

迤度垂虹去，村家結草篷。樹明亭午日，衣漾小春風。青黛看山近，丹黃取徑通。未嫌岩谷淺，步步入雲中。

舊俗含淳朴，熙熙樂事饒。牛驅西澗牧，薪墮北山樵。斷翠捎千縷，深清汲一瓢。最憐溪路好，幽曲不知遙。

乍見層霄矗，蓮華一朵青。中間闢幽徑，四面起高亭。舊挂濂溪月，新成翠草庭。龍潭偕眺詠，勝地眼初經。

夜投龍潭寺同定岩作用韓韻

松炬吐燄明翠微，下澗騰岡火龍飛。黃昏期到龍潭寺，豪興寧容食言肥。疾雷打門破僧夢，給園隨喜如此稀。携來絲瓶苾芻倒，香積厨堪止渴飢。嶺脚盤盤雲氣泄，滃流階面侵入扉。佛樓喧轟人語響，歷亂怖鴿穿林霏。蟾潛海底天墨黑，推窗不見千山圍。獨屢見跋睡魔死，夜坐薄寒添裘衣。置身百尺藤蘿上，豈有世故爲之鞿？千載狂呼太白起，廬峰窈窕邀同歸。

瀑布和定岩疊韻

入溪初聽鳴聲微，清流汨汨銀瀧飛。灌注下田千百頃，土膏滋潤青苗肥。峰回乍駭激湍壯，水晶簾垂密不稀。扳蘿倒飲老猿黠，盤窟冷卧潛蛟飢。傾崖漱谷陡一瀉，訇然震動開岩扉。萬壑衝撞雷競號，九天噴落珠霏霏。宵衢秋霽蜿蜒掛，滄江峽束雲濤圍。凌空濡蘸骯髒筆，倚石浣濯塵埃衣。還疑支祁擘水府，鐵鎖掣斷鐺琅鞿。夜深月照煙靄破，潭潭洞穴神龍歸。

留別定岩疊韓韻

九江夜夜明少微，白雲遠帶丹楓飛。我有怡悅不須贈，知君道寔能自肥。蓮峰兩日插筇杖，醉吟情味時所稀。新詩鮮脆似萍實，咀含信足忘輟飢。今年恰逢四十五，元公四十五歲卜築廬山。濂溪乍闢書堂扉。架岩鑿谷位置妙，攬結夕靄兼朝暉。千秋追還吾與意，空亭卓立青嵐圍。陪遊緬想古光霽，飄飄把我風中衣。蒲帆遄掛湓浦月，捷若快馬瓏璫鞿。雲鶴無心任來往，矯翼八表翩翻歸。

留別張君步韻二首

廬嶽霜濃木葉稀，南雲何處尚相依。雁鴻嘶斷煙中浦，薜荔搖殘月下幃。吳岫嵐迎孤客返，湓江風送一帆飛。懸知歸路逢群彥，籍甚才名問陸機。

高才邂逅輒相知，秀句朝餐飽我飢。流水淙潺聞逸調，白雲縹緲指前期。喚玲瓏唱誰能那，駐孝廉船更不疑。來歲賡吟聯主客，喜看騷雅各清規。

留別蔡君步見送韻

因依群雅客心安，況接鄉音共一壇。松柏經霜彌覺茂，與予同庚。江湖行路不知難。小冠

子夏空凝睇，與予同名，予適病目。白社遺民總達觀。一片清寒滄海月，明朝獨向庾樓看。

留別高君疊韻

孤帆遄挂敢懷安，回首清光月滿壇。溢浦風高行自疾，庾樓花滿會非難。酒從北海樽中瀉，史向東林傳裏觀。君爲忠憲公元孫。知我新遊衡嶽返，雲嵐猶把杖頭看。

酌定岩得大府留予主濂溪書院垂示之作疊韻

宋道學傳惟元公，手揭魯日懸天中。嗣洛關閩掃穹碧，開先發矇超群雄。道州山川應圖象，嗚呼混闢其無窮。膠西耳孫舊莫逆，高步綽有前賢風。廬陰相宅志復古，昌明絕學標易通。虹衢登丁動畚鍤，鑿岩駕棟凌高空。書堂中高亭四拱，工匠雲構天和融。香爐面陽睟天漢，陰湫潭洞龍爲宮。噴飛瀑珠濂溪白，絢爛霞綺蓮華紅。崇卑位置合造化，皇天默牖君侯衷。杖歸衡岳雲滿袂，請敷重席安微躬。慚呼餘山門弟子，大府折簡謀僉同。乾坤此舉萬萬古，須友祠桷偕初終。書院構餘山先生須友堂。經營斷手百事集，般倅妙借神靈功。我捫峰月望光氣，太極岩上霄朧朧。綠池清香待靜植，且教往復錢唐東。

重留別定岩疊韻

遺經欲闡微言微，潯陽暫止孤帆飛。千鎚響動蒼厓麓，岩泉清泚山土肥。浮嵐面勢神指畫，書堂舊觀形依稀。省憶雲岑對隱几，濂溪洋洋曾樂飢。峨祠列舍矗雲際，四亭面面開風扉。匡廬溢浦大闔闢，吐納山翠昇江霏。連峰左右氣完固，宛似太極圓圖圍。歎我老住元公宅，夢流光霽芙蓉衣。餘山精靈陟丹構，星爲旌旆虹爲鞿。海東噉鴻恍惻耳，來春重至今過歸。

奉酌諸君重見送疊韻

離筵既散解蘭艫，並惹鄉心亂旅窻。雜樹有花飄玉屑，孤鴻如箭擘銀瀧。群公豪氣冲南斗，獨客高歌動大江。川路往還乘野興，甕罌底用玉爲缸？

定岩出關見送疊韻却寄

浮波一葉下輕艫，月黑孤蓬早閉窻。關口熒煌來列炬，沙頭歷亂濺飛瀧。已教醺醑傾千盞，未用琵琶撥九江。預約明春重握手，仍斟今歲未開缸。

舟發九江疊韻

葉盡波寒解客艫，煙消猶見庾樓窻。奔飛帆影捎吳楚，夢斷吟聲鬪嶺瀧。遊屐雲中下南岳，書堂天半俯西江。暫歸還作廬山主，親舊多應勸綠缸。

湖口

彭蠡無窮水，茫茫浸太清。寒光搖兩槳，雲氣入孤城。波浪憑虛湧，胸襟到老平。吟遊過湖口，所得是空明。

大孤山

峭嶸彭蠡口，卓立飛雲孤。波聲應鞞鞳，塔影涵模糊。連雁破杳靄，一螺浸空虛。天寒光氣冱，景曉晴光鋪。風濤度浩渺，霜木知凋枯。雙鐘迤明秀，翠斷澄泓湖。

石鐘山歌

石鐘山勢何孱顏，大湖風起橫翻瀾。水石震宕怒相搏，噌吰鞞鞳聲振天。帝張廣樂衆器全，鐘聲乃在群音先。想當元黃初冶鑄，陰陽炭入鴻爐燃。巨靈鼓橐籥，模範鎔山川。乾坤法

物鎮常在，擊之一十二萬年。野夫放浪天地間，登高長嘯空谷傳。大聲相應水上作，華鯨鏗破彭湖烟。南北筍簾雙高懸，大鐘小鐘徹重玄。周景魏獻何足齒，知音不數玉局仙。渾茫元氣資節宣，體用自具寂與喧。風恬浪靜音響息，縹緲有似海上之神山。

彭澤奉懷陶公

陶公輕解組，歸思劇飄飄。詩酒從吾好，形神並覺超。菊看秋露墜，柳任好風搖。今日聞羈宦，寧惟事折腰。

小孤山

四面天在水，浮出青巔峴。乍疑汎瀛海，引作員壺觀。黛螺遠際點，翠髻空中盤。神光渺難即，秀色真可餐。岩亭帶薄霧，縹緲臨微瀾。大孤宛却立，邢尹同時看。輕帆過彭澤，恨不梯層巒。終焉御風往，獨立朝雲端。

彭浪磯戲作

今年大小姑，先後嫁彭郎。彭郎自言尊，驕比楚襄王。妃色孰殊衆，細腰搖明璫。暮天雲雨足，還希夢高唐。

林中鹿并序

舟中聞甬東客談林中逐鹿事，作《林中鹿》一章。

虞欲逐逐，林中即鹿。鹿人人手，虞乞分肉。鹿不汝有，肉不飽口。爲我謂虞，盍潔汝守？

東流

東流抱山轉，城郭水雲端。江上詩情遠，天邊客夢寒。老難拋雀髮，閒許把漁竿。旅服無塵土，篷窻映碧瀾。

黃石磯守風

黃石磯頭泊，朝朝盛北風。來帆過奔馬，滯客背飛鴻。清醒愁參半，懽騰酒一中。歸程何事急，且作信天翁。

安慶

行樂曾何待，逍遙在客間。帆開黃石浦，雲起皖公山。一浴體無垢，獨行心倍閒。渾如浙

江口，沿岸踏歌還。

桐城

小艇仍須繫，橫江不可行。魚龍舞中夜，風雨撼孤城。忠信濤堪涉，文章老未成。山川憐皖口，好爲放新晴。

荻港

寒港瀾漫動遠涯，蕭蕭敗荻影橫斜。同雲萬里天將雪，積水千盤客汎槎。想像孤軍屯虎豹，寂寥往事化蟲沙。遙憐星賁梅花嶺，五丈原頭並嘆嗟。

九華山

片帆挂清曉，霧中過九華。朦朧見山色，未得維江槎。秀岑矗窈窕，奇洞含谿訝。尋幽屐未到，凝想空咨嗟。雲房隱深曲，月澗流清窪。疑有老僧在，獨自棲煙霞。

蕪湖

南指孤帆疾若飛，蕪湖緣岸闢郊扉。家僮貪買新菖酒，行子思添故篋衣。米價關心論貴

賤，土風到眼習輕肥。老蟪歲久無留影，還向沙頭問舊磯。

蕪湖夜大雷雨歌疊韻

荒江風雨又一奇，春天巨浪喧空陂。神兵縱錚戛鑛鐵，龍宮砰磕敲晶璃。漲如海穴神鱗入，鬚鬚百怪躩踞集。隣船若聞大纜斷，檣傾舳舻吁何及。篷窗四面扃不開，盆翻衝瀉黃篋埃。巨靈併力作氣勢，萍翳驅駕飛廉來。長年三老憂莫測，吳商越估涕頻拭。如椽之炬頃刻灰，指掌不見天墨黑。嵯峨列艦高如山，鐵貓輕宕江中間。狂沙亂奔螭磯廟，危岸搖動蕪湖關。我心默定涵元珠，翻波一任魚龍趨。明看碧渌紅亭在，萬態惶惑歸空無。吟遊不知老將至，履境平陂信天意。江行奈此驚險何，詎若陸海風濤多？

廬江大雪歌疊韻

天工試手標新奇，紛紛玉戲拋江陂。凍日弢藏紅韎鞬，遙天裝合白玻璃。水軍組練無聲入，萬里合圍勢並集。元冥號令一夕傳，滕六飛馳已遍及。同雲四塞黯不開，乾坤下上無纖埃。窻罅飛花撲點點，忽如捲地春風來。洲沙深淺浩莫測，滿篷壓重渾難拭。閨寂空村語不囂，檣竿翔繞飢鴉黑。崔嵬斥埃堆若山，林野總在空濛間。咫尺地隣螭磯渚，三百里阻龍江關。還聞急霰亂投珠，江田無路難爲趨。青州從事不可覓，欲博爛醉終虛無。迢遞鄉關何日

至，繁愁縈惹羸僮意。新詩劇想和羊何，老夫野興令宵多。

聞近顏卜居江寧未及過訪疊韻奉懷

素書擲還黃石公，赤松追逐烟霞中。神仙飄忽底處覓，即在退步之英雄。抱奇落拓憶我友，直道不問達與窮。才略滔滔匯滄海，意氣浩浩驅雷風。單車過嶺粵人喜，徒步出塞漢節通。百年仕已識強項，赤日照耀浮雲空。終奈貝錦不停織，故山景物看暄融。山澤閒行服野服，踏遍梵宇兼仙宮。近聞幽栖在白下，石林映射朝陽紅。南岳書來曠吉士，亦云夢繞魁梧躬？千里並愁廬舍遠，一日稀得琴樽同。龍江關外布帆落，悵聞夜柝清漏終。旅途冰雪迷所向，短僮瘦杖難爲功。獻歲重過決走訪，孟陬攝提貞朧朧。兒童譁報客不速，來自錢唐東復東。

龍江關守風走覓近顏里居不得悵然疊韻

黃醅爛醉眠艚公，軒波大起龍江中。着屐鼓勇訪我友，橫衝鐵杖心何雄。關津覓渡走還拉，瓊瑤踏破途寧窮。沿緣睥睨三二里，寒樹颯颯飄回風。晴飛玉屑亂撲面，白下門取一徑通。大城遼闊昧處所，祇見鍾阜堆霜空。浙瀝橋冰忽已碎，崢嶸樓雪全未融。道傍側耳聽僕各，鐸鈴冷語金銀宮。白谷溟濛短景白，紅牆誤認朝霞紅。林廬難覓爽塏地，雞黍徒想殷勤

衷。僮憂踰烏將暗墜，逆旅誰納羈栖躬？江潯急須抱堞返，曲室那覩團爐同。呂安空復相思切，王猷早遣清興終。縱思題門向底處，率爾命駕曾何功。峨舸排列幾莫辨，沿流夜火紛隴臃。同心離居悵若此，客夢猶繞江城東。

燕子磯

二十餘年別燕磯，復看石勢凌空飛。梯登磴確何其巍，倒搖枯柳煙霏霏。中流宕漾寒日暉，樓臺帶雪壓翠微。北風歛吸搖金扉，砰礚拜浪騰江猗。蔣山縹緲過雲旂，龍盤虎踞臨舊畿。六朝金粉草露晞，金川逝波浩東歸。漏舟歌舞金縷衣，漁舫葉葉橫蘆碕。舊遊如夢省依稀，大功坊裏連屏闥。飛光轉盼馳驂騑，秣陵人去空涕揮。剩我白頭絕因依，音塵一斷人事非。白波洶洶青天圍，輕帆疾去若發機。往尋裴島泝清輝，回首雁影江天希。

真江雪月歌兼懷舍弟冀銘鼎元疊韻

真江夜景幻神奇，雪月晃朗連千陂。星光忽自亂螢燭，玉色不復分瓊璃。貝闕鮫宮不可入，依稀海市萬寶集。寒聲磔磔起灣隈，鵙鵲鸚鵡追飛及。清虛之府蟾窟開，一輪鏡淨原無埃。恍聞霓裳羽衣曲，雲外飄飄仙樂來。新河千丈深難測，湘簟平鋪翠如拭。離離回轉斗樞明，沉沉潛伏蛟螭黑。依微一髮江南山，白輝晃漾青冥間。舟子懵騰卧船尾，行人蕭瑟迷鄉

關。寒空高懸光明珠，如畫不見魍魎趨。藐姑仙人何綽約，瑤臺獨立渾如無。素娥玉妃連袂至，侑我清樽殊快意。連枝其如阻隔何，瓊林瑤樹空復多。

金山歌

三神山浮大瀛海，一峰飛墮京江濤。帝遣留此作壯觀，其下首戴一巨鼇。憶昔歸乘瓜蔓水，截江半渡維輕艘。起攀欄檻躡塔影，浩歌一放平生豪。驚濤飛洒枚乘筆，波面組練戰始鏖。喧轟聲勢動天塹，奔騰萬馬雷怒號。便欲飄然汎槎去，往觀扶木盤根牢。所嗟人事尚羈紲，未漾日傍恣遊遨。十餘年間一轉瞬，鏡裏白雪生顛毛。謁來新從南岳返，雲嵐猶著大布袍。好風吹度洞庭水，扁舟蕩漾信所遭。要汲中泠復踞頂，千丈素縷手自操。冰瓷滿注洗雙眼，紛紛輕薄看汝曹。汝曹何曾值一笑，置之直上登妙高。曠覽江天盡萬里，大江日下流滔滔。

憶次兒繩球

憶昨京江問渡時，扁舟東下重逶迤。懸知夢繫萊堂綵，莫慣沉吟騎省詩。洛下朋儕嗟聚散，江南風景苦流離。還憐骨肉京華遠，雲裏書傳雁足遲。

圖山東一首奉懷圖東兼寄石蓮

煙雲景聚圖山東，圖東詩老家其中。詩老今在東陝窟，萬錦灘邊詩興濃。我昔梯登太華返，投轄夜汎琉璃鍾。邀約蘭橈蕩京口，吟眺直上江天峰。尤愛松寥徑幽絕，往訪焦仙參吟筇。瘞鶴銘看體完好，龍蛇跡動荒榛叢。去年歸題甘露寺，碧紗底用居僧籠。留待飄飄雲袂過，以手拂拭塵埃蒙。今我來自南嶽頂，北固雲氣迎孤舂。大江雪月擁浮玉，狂歌起踏金芙蓉。却憶石麟迭抱送，兩兒秋水明青瞳。齒牙清歷誦好句，庭除樂事何融融。仙姿真見黑白髮，吟壇詫此矍鑠翁。別來中州僅匝歲，如雲冠蓋隨飄風。大河以南幾千里，天西一點孤飛鴻。丁卯橋寧引獨往，乙亥歲已嗟重逢。人生會面洵難得，況復日御臨高春。鹿邑老子今何似，爲我問訊青牛蹤。

乘興

是處灣隈滯客情，今朝一笑破江程。連天雪嶺嵐無色，下瀨風帆浪有聲。遊遍煙霞原結習，歸逢鷗鷺又尋盟。天教老體多强健，乘興長爲萬里行。